

Juthiyai

Juthiyai Pikariyikwia Yidavakesi.

¹Nya'mweihi,

Juthiyainyi, nimi Jizaazai Kiraazitiyare yaasiwa'wawinyainyi, Jemizari gahwaalaangeinyi. Sareinyi pikariyikwia da' Gotiyai jaka yihizivwaramaaraakeihiri yihithawasiwaabe. Gotiyai Nimwai sahwari sariminyina wivu'nada Jizaazai Kiraazitiyai gami sahwai sariminyi yihimaredaa'manikelyi. ²Gotiyai sariminyina kale'na gaimwangebulyi kwaamu'nanyabulyi sariminyina wivu'nyabulyi yihizaavana! Sasare sahibwi sariminyi naanga kuna yihima'nana!

Yagaala tewaanyavina yikamaanga yadivisaraavina dinikebwinesi.

³Nimire nya'mweihirina tewaanya nyivu'nadeihi, aayagaa' sariminyi wija ya'ne simunya naanga yawirena “Gotiyare tewaanyaraavina Kiraazitiyai nemi yuyainaavi padaihasamaata sa'na pikariyikwia' yarai yidavima!” dena yiweinyi. Dahaa' yawi'manige. Sariminyina yagaala piri' pikarya dara yidavideinyi “Sarimi diraginna jila! Nemire diraginna limwangebwi maremwaa'lyana yagaala tewaanyavine yikamaanga yima'nadivisaraavi nayaa tivikirasi'naana! Yune gave pigaa'na Gotiyai diraginna limwanga dazabwi gamire a'mwe tewaanyainaavina nejaavakebulyi. Sare'na yihithihaa'bwarima!” ⁴Sare' drevinyi. A'mwe akwara Naangerina limwaga'daanyainaayawinna “Nemi Kiraazitiyareina,” dadiyi' kima'nyikaanya bwina. Sinnawi kigaakuna Bukuyavi a'mwe sasare dazara Gotiyarina bule'na wijaavadivisara Gotiyare jidasavi yi'mavapijiyara yinahu yiwina yipi'deraavina dinikesi. Sahwara Gotiyare yanga gaimwanga sa' maroyimaa'nya yadivi' nabinya pibwibi' yadivi' yi kumire munyi' dika yidada kayaa'na girikita'nanyabwi yadivisare. Darerera. “Gotiyai neminyina yanga gaimwangeburina nemire girikita'nanyabwi yaasiwa'na nemarasi'nade'na sarebwi naanna

yaana!” kwaasi dadivi' yadivisaburi. A'mwe sasare dazara kwaasi sara yadivi' nemaremwaaiide gave pwai, nemire Naangei Jizaazai Kiraazitiyarina “Aala!” dadivisare. Navika yibwaakadivisare.

⁵Sarimi yuya datha mena yawi'divi' kiri' “Dazangi ayina yawipika!” dena dihaa'bwata yihide'nanyi. Piri' daresi. Sinnawi kigaa' Naangei gamire a'mweraavi padaihasamaaraka Anga Yizipi yagalya'maveveraavi makwiaakere. Sara yaka kiri' dividaa'nyi gaminyi diraginna malimwagesaraavi tamakina ya'. Yi sahwara kayaaka yinyina ye'. ⁶Nabaai piri' daresi. Kigaakuna Gotiyare mamaaya ejeliya pwaraji kumire wawinya aaya mudi'nanya savi nayaa mwaletara mi'. Aawa. Kunnya angeba yagalya'ma'na yesare. Sarevidaa'nyi Gotiyai kwaari'mawilyasi wila pwiwaka kalavuzavi wimwaaihakera yuyagaa' yuyagaa' mwalibainiga'. Sareraavi jihinya yuna kayaa'nanaangewi kewewini wilawimwaaaha'. Sahwara Gotiyare Yirika Naangerikina yawibwarya'negaa' daapi'dehaa'na yemwaaaha'. ⁷Nabaai piri' daresi. Kigaakuna a'mwe Sothomi mwaalyaraji Gomora mwaalyaraji anga naanga aya kiba mannikebajiyaraji sahwara avaainanyabwi yesare. Kayaa'nanya girikita'nanyabwi midinna. Kumire simunyi widika'daa'nyi avaanna kayaa'nanyabwi a'mwe yaasiwaka pwaraji wilaye'mwannayamarina. Sarevidaa'nyi Gotiyai kayaa'nanya' wirivikirakera dika yuyagaa' mwalibainya'nevi wimwaaihina. Kayaa'nanya' wirivikita daza' nemi tinna wangadaa kumire sabwi mamidinyi yaade'na ku'maayaba simunya yawiramaarya'ne' yinikesi.

⁸Sahibaabi' a'mwe dahaa' sariminyawi mwaaihata dazara da'dare sabwina yadivisare. Kumire waja nabinabinya saza sahwaraavi widihaa'bwa'da kumire kilaakejiki kayaa'nanya girikita'nanyabwi yadivisare. Sahwara naangeraavi pihadika yadivi' mamaaya byaannakeraavi biraiyagaala widangadivisare. ⁹Kiri' kigaa' mamaaya aaya mudi'nanyai Maaikeli sasara mi. Sai Saataaniji tivikita yinyelyagaa' “Ne Mozizare kilaakeji' aaihwai maaradezi' dingaka?” dahila yagaikwalaalya dinagileraalyi. Kiri' Maaikeli kayaa'na mi yaka Saataanimi biraiyagaala kayaa'nanya' ayina murivikiryaakelyi. Aawa. Sai dara widina “Yune Naangeina maiyagaalya' githana!” ¹⁰Kiri' a'mwe dazara kwaasi yagaala dadivisara biraiyagaala widadivisare. Yi yuya piningine aaya kaavilya myawiranganyadivisangina biraiyagaala dadivisare. Nabaai yuya kumi yawi'divita sabwi yikuriyaawia simunya maayaraavirebulyi. Sarera kilaakeji'na midinna yadivi' sarevidaa'nyi sasare dazabwi yuna kayaaka wigalakadevulyi.

¹¹We! Sasare sara mala nayaa yiwannipika! Sare' dare'nanyi. Ne Keni Gotiyari navika yibwakyakabaabi' sahwara navika yibwaakivanigasare. Yi Ne Kenimire saburi yamaryadivisare. Nabaai Ne Belaami nigwia maarya sanne'na kwaasiyabwi wijiwakyakabaabi' dazahwara yune nigwia

maarya'na yawi'divi' Gotiyareraavi kwaasi wijiwaakadivisare. Yi yime'nya'bi' nigwia'na kwaasi wijiwaakya'nera kumire kilaakeji' wijaavadivisare. Nabaai sinnawi kigaa' Ne Koraa Ne Mozizariji maiyagaala wijaakabaabi' sahvara Gotiyari pihadika yadivi' sasare dazaburi wana yiwina yipi'derera.

¹² Yuyagaa' sarimi yi'bwa'nemwaaidivi' tika munneji yadivi' avaaizimunya yawisa'naji sirya'mweraavi gaimwagya'naji yadivisagaa' a'mwe dazara yi'bwa'nemwaala dazavi girikita yigaidivisare. Sahvara tika sarimiji yihye'mwannanadivi' kiri' sahvara kumire tika wapaaya sa maremwaainya'na yadivi' lika aane pimili' kimili' yadivitara mi'. Yi pwaraavina myawiryadivi' kuminyina, kuminyina yawi'divisare. Jarisagaa' yiraaya yihusa' yaasiwa' mariwinakamarya burike' mabwalari ya'ne yadevaaibisarera. Sahvara yagaala deva kiri' nayaa sara myadivisare. Nabaai yisika kumiregaa' yisilya mi'nyadevaaibisarera. Yi yita sika yawaka mena bainikikaavi a'mwera kaavilyawi mena lamaipurasi'nikerabisare. Sasare sika pigasaai bainikerera. ¹³ Sahvara wagila wivwa'nya'ne kininnaka sabwi yadivisare. Sasare daza' saalaalya aalimavajinaaka naange' yada aalimaagwalya' yima'nadevaaibisabulyi. Nabaai sigunyavi silingaaminyarika mwaaidivi' kunnya tusa' yagalya'ma'divi' a'mweraavi kayaa'na yibwaridaakwadivitabaabisare. Sare'na Gotiyai anga jihinya kayaa'nanyaba mena yovirawakivanikeba wari'. Yuna jihinya naangeba dazahiba yuyagaa' yuyagaa' mwaabi'deva.

¹⁴ Ataamimidaa'nyi mijiyima'nigaveva ata puridaa'nyi pwaraalyai Ne Yinoki yima'nakelyi. Sare sai a'mwe dazahwaraavina sinnawi Gotiyari wi'nakenna a'mweraavi wijiwakyaakelyi. Sai dina "Yithaanyi! Nimi tinna wangadaari Naangei gamire mamaaya tewaanya kwalaalya taawizaniyaraji ye'mwannigwalaabipi'delyi. ¹⁵ Sai a'mwe yuyaraavi yawibwasagaa' kayaa'nanya' naanna wirivikiradelyi. Sai a'mwe gaminyi bule'na wijaavadivisara jidavade'na sahvara kumire bule wijaaya sabwina yadivisanna nayaa yibwakibi'dere. Yi yuya sanna bule wijaayabwina jawibwarya'negaa'. Nabaai kayaa'nanya dazara bule'na wijaavadivisara Naangeri yagaala kayaa'nanya dala pininna pininnanya mena widesanna jidavade'na walaabathelyi." ¹⁶ A'mwe dazara naangeraavi bulayagaala dadivisare. Sahvara yuya kuminyi yima'nade sanna jikurya yina yadivi' munyi' kayaa'na yadivisare. Kumire munyi' dikaa'da dikebi' yidamaryadiki. Sara yadivi' sahibwi mididivisare. Sahvara yaasiwa' kuminne yaya' jaka danganamaryadivi' kuminne yayanna makinadivisare. Pigaa' a'mwe pwaraavi wabwiwayagaala widadivi' kumire gilyivisa mwagi'nya'nenna. Sarerera.

Diraginna limwangebwi nayaa diraginna limwagarya'nebwines.

¹⁷ Kiri', nya'mweihirina tewaanya nyivu'nadeihi, nemire Naangei Jizaazai Kiraazitiyare widaasaderaavire yagaalya ayina nayaa

jawirila! Sinnawi kigaa' wijiwaakesasi. ¹⁸Dara yihithesaihilyi “Divi aaya yima'nadehaa' a'mwe pwara puri'nyarabi! Gotiyare sabwina jika gyangadivi' biraiyagaala dipi'derera. Sara yadivi' Gotiyarina bule'na wijaavadiyi' kumire munyi' yaasiwa' dike'bi' yidamaryadiki.” ¹⁹A'mwe dazara Naangereraavi jaapaidivisare. Sahwara a'mwe Kwaakevakiyaraavire simunyabwi mididivi', yi Kurya Tewaanyai maayara.

²⁰Kiri', nya'mweihirina tewaanya nyivu'nadeihi, yuyagaa' sarimire diraginna limwanga yune nawi'nyaanga saburine'na yune sarimire simunya' diraginya nayaa jivaimwagila! Yi likilyavi a'ba madivitabaaibi' yagaala Gotiyai nedake diraginya je'mwagyila! Sara yadivi' nabaai yuyagaa' Kurya Tewaanyai wilayihimwaaidori ye'mwagakiyagaalyavina nayaa jithaanganyideihilyi. ²¹Sarimi Gotiyai sariminyina wivu'nadevuri nayaa kuna dimwaalyila! Yuyagaa' Gotiyare wivu'nya'nebwi nyagalya'mapidika! Nemire Naangei Jizaazai Kiraazitiyai gamire kale gaimwange' ku'maayaba maryaliku'naraabathevina jemwaalyidehaa'na kuna sara jila! Sarevi nabaai sarimi yuyagaa' yuyagaa' nayaa divada'galemwaalyide gaala nebulyabwi maarya'neihilyi. ²²Sarimi a'mwe pwara diraginna limwangebwi nayaa tihu'na malimwagi, maali'na yagalya'ma'divisaraavina kale nayaa yihyana! Nayaa duhaimwagyila! ²³A'mwe pwara dikevibi' mwaaidapi sarevi sahwaraavi yime'nya'bi' divadaihasamaarila! “Nimi kayaa'nanya sa' nyiwidika!” didivi' lika nayaa yadivi' a'mwe saraavina kale nayaa yihyana! Kiri' mala nayaa jiwannyila! Kumire kilaakeviya simunya sabwi kumire baazi'ma'nya girikita'nanya sabisabulyi. Sahwaraavi wigaimwadivi' sasare dazaburina sarimi yuyagaa' menyaba dimwaalyila!

Gotiyarine yaya' munyaba makilya'nebwinesi.

²⁴Gotiyai sai sariminyi yiniga wi'na yihimaremwaaidori yi yihimaredaa'dori sarimi mwalaraawi jideihilyi. Sai sariminyi yiniga wi'na yihimakwawoji gannyaba nawi'nya byaannakeryawi yihimwaaihadeihilyi. Nabaai sarimi yiwetawakya pini mwari yihyana! Sarevidaa'nyi nabaai yilaaya naangebwi yihwaradeihilyi. ²⁵Gotiyai yune gavei sawaina mwaalikei. Sare sai Jizaazai Kiraazitiyare wawinyavina neminyi nevadaihasamaarakelyi nemire Naangerina. Nemi gaminyine yaya' munyaba nayaa makilaana! Sai nemaremwaaide Kingiya gavei kuna mwaalana! Sarei diraginya naange' kininnakei kuna mwaalana! Yuya sangine'na aaya kaavilyai kuna mwaalana! Yuya sinnawi kigaasi nabaai dahaa' kigaasi nabaai divi yuya kigaakigaasi sarei kuna mwaliabainagwona! Sahirisi. Nebula naangesi.

Juthiyai